

PANTUN PERLIS INDERA KAYANGAN 2

Susunan : WAN NAN WAN MAHMUD (FAWANA)

Selain daripada Encik Wan Khazim bin Wan Din, terdapat beberapa orang lagi pemantun di negeri Perlis ini. Misa(nya Encik Mahmud Wahid (Tokoh Awang Batil), Encik Hanafi Osman, Encik Ahmad Saad dan Puan Haton Abdullah (lihat : KURIK KUNDI MERAH SAGA, KUMPULAN PANTUN LISAN MELAYU DBP. 1990). Sekarang dipaparkan sebahagian lagi pantun-pantun yang sering bermain di mulut anak-anak Perlis hasil dari ciptaan pemantun-pemantun seperti yang tersebut di atas.

Akar pulih Wang belang,
Akar lama melilit pongsu;
Kalau tak boleh seperti dok cadang,
Nak bawa cerana menghadap guru

Anak dara tersenyum simpul,
Baru selesai bersanding semalam;
Parang saya memangnya tumpul,
Tetak tak luka patah di dalam.

Anak lang di kayu mati,
Patah ranting terbang dia;
Saya dagang tumpang berhenti,
Kecut hati berjalanlah saga.

Anak lang di atas gunung,
Singgah semalam di Bukit Pinang;
Tengah malam bangkit melengung,
Bila tahun kita nak senang.

Anak lembu tak tahu ke lembu,
Pintal tali kembar tiga;
Kalau nak bertemu tak tahu bertemu,
Cuba nanti di jalan telaga.

Burung merpati di Bukit Ngulang,
Anak merbuk sarang di luar;
Kuulang pagi kuulang petang,
Hingga buruk kaki seluar.

Dari Chuping ke Alor Sena,
Bawa mempelai teruna dara;
Hati ingin memetik bunga,
Pohon dibelai ular naga.

Dari Kangar pergi ke Kuala,
Baru mari Simpang Empat;
Ilmu orang dahulu kala,
Tak ada nak beli payah nak dapat.

Gunung Medan utan Aji,
Padang Mawa padang berlumpur;
Kalau dah anak menqaji,
Bolehlah berdoa di atas kubur.

Hujung Batu jauh di kota,
Ke Bohor Temak membeli kopi;
Benda tak tentu janqan di kata,
Benda tak gamak selalu jadi.

Ikan Wang di dalam belanga,
Mari bercampur dengan pelotan;
Alangkah malang nasibnya bunga,
Dilanyak kumbang jadi belacan.

Air pasang deras ke hulu,
Bila tenang dimandi budak;
Kami datang pulang dahulu,
Bila senang mari pula.

Anak rusa terenang-renang,
Mari berenang dalam puan;
Siang malam saya terkenang,
Bila ingat budimu tuan.

Anak Cina anak Melayu,
Anak Keling keliling kota;
Wahai bunga jangan layu,
Simpan sunting sampai tua.

***Ingatlah kamu kepada Ku, nescaya Aku ingat kepadamu
dan bersyukurlah kepada Ku dan janganlah kamu mengingkari (nikmat Ku)
(Al-Baqarah : ayat 125)***

Anak itik makan padi,
Padi disimpan di bawah tangga;
Cantik sungguh adik yang tadi,
Siang malam terbayang di mata.

Bagaimana nak tanam selasih,
Tanamlah mari di rumpun keladi;
Bagaimana hati nak kasih,
Kasih bercampur denganlah budi.

Anak punai anak merbah,
Pandai ia membuat sarang;
Anak sungai lagi berubah,
Ini pula hati orang.

Anak ayam dalam celepa,
Buka tudung memasak padi;
Siang dan malam saya tak lupa,
Kasih terkandung dalam hati.

Air pasang mudik he hulu,
Orang Cina belayar perahu;
Pernahkah dengar dari dahulu,
Tebu pisang gajah tak lalu.

Anak haruan lima-berlima,
Mencari makan di balik daun;
Harap tuan saya terima,
Habis bulan berganti tahun.

Anak empat disangka enam,
Ibunya lari tinggal seorang;
Sakit diubat mati ditanam,
Tentulah budi dikenang orang.

Anak kerbau mati tertambat,
Mati tertambat di pohon pandan;
Baru sekarang saya mendapat,
Terasa nyawa pulang ke badan.

Anak helang ke kayu mati,
Patah ranting terbanglah dia;
Anak dagang tumpang berhenti,
Patah hati pulanglah dia.

Asah kapak tajam beliung,
Tebang mari kayu berduri;
Tuanku umpama kemuncak payung,
Patik di bawah berteduh diri.

Asah-asah tajam kalam,
Mari ditulis di kertas Cina;
Sungguhpun tetak patah di dalam,
Syarat ubat carinya kena.

Asam paya mabuk di paya,
Masak sebiji tangkainya merah;
Tidak daya dengan upaya,
Kerana budi diri terserah.

*Rujukan : Kurik Kundi Merah Saga.
Kumpulan Pantun Lisan Melayu, DBP. 1990*

***Kami perintahkan kepada manusia supaya berbuat baik
kepada ibu bapa.
Ibunya telah mengandungkannya dengan susah payah dan
kemudian melahirkannya dengan susah payah pula.
(Al-Ahqaf : ayat 15)***